

# 2 Peturu

## Peturu okusiwa mijẽ maekwerà

### Imovyvya

Aã kareta Janejare'e 'Ăg omotekokuwa Peturu tokusiwa mijẽ Jesu koty rewarà kō pè maekwerà. Jesu remimo'ekwerà tè Peturu. A'e kareta okusiwa mijẽ Jesu koty rewarà kō pè, iteetejẽ taa wānà kō pè upa. Kee e'i ikusiwa ijupe kō: "Janejare'e omoe'e imojikuwaoka Wa'yry rōmō remẽ, oromã'ẽ ee. Oroenu teve kee e'i remẽ: 'Era'yre'e tè āwī. Eremiauvay tè. Eroryvay ee mǎ'ẽ tè', e'i imojikuwaoka remẽ. Ikasia renya rè tè tesō oromã'ẽ, a'evō ekoi remẽ", e'i ikusiwa (2Pe. 1.17). Peturu okuwa Janejare'e ayvu e'e rè rōwā poromō'e mǎe kō uu ipyterà kō pè. Ajawyi kee e'i teve ikusiwa ijupe kō: "Oiko ajamã'ẽ kee e'i mǎe kō: 'Janejare'e ayvu oromojenutà pejẽ pemotekokuwa rōmō', e'i rǎ'āga mǎe kō", ejaa (2Pe. 2.1). Āmō, kee e'i ikusiwa: "Nojikōtevẽi Janerōvijã ywete ovāea rǎ rè ajamã'ẽ. Wārō jẽ jane kō tojimosiōka waiwererà kō reityppyipaoka ijupe kupa... Opota jane kō pirujẽ opyri toiko karuaru iko. Nopotai jane kō omonooka owyi", ejaa teve (2Pe. 3.9).

### Peturu ojikuwa ijupe kō

**1** <sup>1</sup> Simão Peturu tè ije. Jesu Kiristu epyteporo wemĩgwai rōmō taiko, wemimonokwerà rōmō. Aã kareta ije tè akusiwa pejẽ, Janejare'e koty rewarà kō rōmō. Janejare'e ikatuay wete janerereko ipi. Jesu Kiristu ve a'evō ekoi. Janereko katuarà rōmō ekoi. Okatuaya wyi ojirovijaoka janeupe. Epy wete mǎ'ẽ vo Jesu Kiristu rè jajirovija mǎ'ẽ jane. A'e rewarà tè akusiwa pejẽ ajupa.

<sup>2</sup> Janejare'e yveve pekuwa katu. Janerōvijã Jesu ve pekuwa katu. Janejare'e ikō tapenereko katu okatuaya rupi nẽ, a'e pejẽ. Tapepy'amopiryvvy katu jẽ ikō teve penereko nẽ, a'e pejẽ. Age'e ywesō ta'evō penereko.

**"Kee Janejare'e opota tijaiko wemĩgwai kō rōmō", e'i mǎ'ẽ**

<sup>3</sup> Janejare'e ikatuay wete. A'e ywesō ivo katu mǎ'ẽ. Janepyteporopa opyri tijaiko. Āmō, janepyteporopa weruparà mō tijaiko. A'evōa

rômō janemokasia kō iteetejē ome'ē jane, okasia rupi. Mā jē rōwā naikoi emime'ēgwerà kō janeupe āmē. <sup>4</sup>Ajawyi janemokasi ipi. “Kee ame'ētà pejē pemokasia rômō”, e'ipa remē, ome'ē jane ipi. Ivo jaikoa rē janemokasi teve ipi. Ivo e'āa wyi jajireko katua rē janemokasi teve ipi. Ikatuay wete emime'ēgwerà kō. Epy wete mā'ē vo e'ete jane. A'e rupi Janejare'e janerereko katu nivoi mē kō reko aiwerà wyi, emimota aiwerà wyi, nivoi ekoi mē kō vo tijaiko tite e'ā. Āmē tē janepy'a kō nijai'āi. A'evo Janejare'e janemokatu janerereko, oterē jē weruparà mō kōrijō tijaiko.

<sup>5</sup>A'evo Kiristu janerereko katuay wete ipi. Ajawyi tapejimokasi ikō ee pejirovija ywete jē nē, a'e pejē. Kee tapeiko teve. Ivo ikō tapeiko ipi nē. Āmō, tapejimotokekuwa ikō Janejare'e ayvu rē peiko nē, upi tapeiko.

<sup>6</sup>Āmō, nivoi mā'ē wyi ikō tapejireko katu peiko ipi nē. Upi ikō tapeiko ywe'e tite e'ā peiko nē. Pejimomorijau ipe Jesu rewarà mō remē ikō, tapejirovija jē ee pejimomāatā ipi nē. Tapenerekoiva ywe'e tite e'ā ikō ee pejirovijaa nē. Janejare'e reruparà mō kōrijō ikō tapeiko ipi nē. Kee tapeiko. Āwitō Janejare'e ivoaya rupi ekoi, ivo ve tapeiko. Kee teve tapeiko. Āwitō Janejare'e napenerekoivai penaua rē ipi, ivo ve tapeiko.

<sup>7</sup>Tapepota katu pevo jē Jesu Kiristu koty rewarà kō pirujē. Toporoauvay teve poroereko ipi. A'evo 'evoa rupi tapejimokasi Janerōvijā Jesu Kiristu koty rewarà kō rômō. <sup>8</sup>A'evo peiko remē ywesō ikatutā pejē. Aje ywete pekuwa katu Janerōvijā Jesu Kiristu remē, a'evo peikotā teāmā. Pejikuwatā ikoty rewarà kō rômō, eruparà mō peiko mā'ē rupi. <sup>9</sup>Ava mō sō na'evoi remē, nojimokasi ojirovija ee remē, naeapyoi mā'ē vo 'ejē apijarà ekoi ipi. Janejare'e wereko katua wyi earaipa mā'ē vo 'ejē ekoi. Janejare'e omoje'opa ijaiwererà iwyi Jesu mănōa rupi mā'ē wyi earaipa.

<sup>10</sup>Ajawyi kee a'e pejē, eretārāgwerà kō. Janejare'e remipyteporokwerà kō tē jane. “Ejo erupi eremīgwai rômō eiko ky'y”, e'ipa jane. Ajawyi age'e ywesō tapejimokasiay Jesu Kiristu remimota rupi peiko, a'e pejē. A'evo peiko remē, napeity ywe'e tite'āi pejirovija ee mā'ē āmē. Upi peiko jētā āmē peiko. <sup>11</sup>A'evo remē jē sōsi Janejare'e kee e'itā pejē: “Eike erena pē epyri eiko karuaru rômō”, e'itā pejē āmē ky'y. A'e pē Janerōvijā Jesu Kiristu janerereko karuarutā Janerōvijā wasu rômō janerereko. Janerereko katuarà rômō janererekotā. Janemoigeokatā opyri tijaiko karuaru.

<sup>12</sup>A'evoa pekuwapa. Ajamā'ē poromoja'aoka jētā a'evoa rē penereko, eremikusiwarerà rupi, āwisō tapejimokasi jē Jesu rē pejirovija jē peiko. Pekuwa katupa aje ywete mā'ē Janejare'e rewarà, pejimotekokuwapa ee rewarà mō. <sup>13-14</sup>A'evo peikopa ipe remē, poromoja'aoka jētā ajamā'ē ee penereko. I'ete a'evo aiko remē. Akuwa naiko puku'āi ky'y. Janerōvijā Jesu Kiristu a'evoa omojikuwaokapa ije. Ajawyi amānō e'āve poromoja'aoka jētā aepo rē. <sup>15</sup>Āmē tē erenawery pē peja'a jētā eayvukwerà rē peiko. Pejimokasi jētā Jesu rē pejirovija mā'ē rē āmē. A'evoa rômō ajimokasiay wete amātejē ajupa.

**“Jesu Kiristu ojikuwa Janejare'e Ra'yry rômō remēwarà rè oromã'ē mǎe kō tè ore”, e'i mǎ'ē**

*(Mateusi 17.1-5; Maku 9.2-7; Rukasi 9.28-35)*

<sup>16</sup> Kee oro'epa itōkō pejē: “Kāramō Janerōvijā Jesu Kiristu uu tarà mijē. Ikasiyàtā uu mijē remē”, oro'epa pejē. Teywete rōwā oroporegeta aepo jaa rè pejē. Aje ywete oro'e ãmē ipi. Ore ywete oromã'ē ywete ee, okasia revejē ojisa orerovake remē.<sup>a</sup> <sup>17</sup> Janejare'e omoe'e imojikuwaoka Wa'yry rômō remē, oromã'ē ee. Oroenu teve kee e'i remē: “Era'yre'e tè āwī. Eremiauvay tè. Eroryvay ee mǎ'ē tè”, e'i imojikuwaoka remē. Ikasia renya rè tè tesō oromã'ē, a'evō ekoi remē. <sup>18</sup> Ore ywete oroenu aepo e'i oporegeta imuu wena pe wyi remē. Yvytyrapyte 'aryvo Jesu Kiristu reve oroiko remē a'evō ekoi, Janejare'e rena katuyà pè tè.

### **Janejare'e ayvukwerà mojenuarà kō rewarà**

<sup>19</sup> Ajawyi aepo jaa oroenu remē, kee oro'e ijupewarà mō ipi: “Janejare'e ayvu mojenuararà kō karamoe remēwarà remimojenuwerà rupi katu tè āwīvo ekoi”, oro'e. “Aje ywete emimojenuwerà kō e'i amātejē maekwerà”, oro'e ojiupe. ãmē ywesō, “Aje ywete Janejare'e ayvu remimojenuararà kō remimojenuawerà”, oro'e. Ajawyi ikō tapeja'a jē ijayvukwerà kō rè nē, a'e pejē. Ijayvukwerà kō a'evō ve raparina eny kō'ē mǎ'ē vo 'ejē. Ojisa ke'iatu tè rǎ'ī pātōnà pè, ajaate ikō'ēma remē. Ajaate kwaray oē uu ky'y. Āwīvo ve tijaja'a jē Janejare'e ayvu mojenuararà kō ayvukwerà kō rè, ajaate Jesu vāea rè. Āmē tè Jesu aje ywete mǎ'ē rè janemotekokuwapatà ky'y. Jesu ywesō raparina eny kō'ē mǎ'ē vo 'ejē ekoi, ijayvu pepy'a pupe pereko remē.

<sup>20</sup> Kee jaa ywesō tapekuwa. Janejare'e ayvu mojenuarà kō okusiwa ijayvukwerà kareta rè remē, ovote rōwā a'evō ekoi kupa. <sup>21</sup> Otekokuwaa rupi rōwā teve okusiwa kupa. Wemimota rupi rōwā teve okusiwa kupa. Aje ywete Janejare'e 'Āg tè omotekokuwa kō. Omojikuwaoka wayvukwerà ijupe kō tomojenu amātejē kupa ipi. Tokusiwa amātejē teve kupa. I'Āg tè omokasi kō a'evō toiko kupa.

### **Janejare'e ayvu rè poromo'e rǎ'āga mǎe kō rewarà**

*(Juta 1.3-16)*

**2** <sup>1</sup> Oiko ajamã'ē kee e'i mǎe kō: “Janejare'e ayvu oromojenutà pejē pemotekokuwa rômō”, e'i rǎ'āga mǎe kō. Āwitō āwī rapijarerà oiko karamoe remē, apijarerà kō oikotà age'e remē janepytery pè. A'e kō, “Kee e'i Janejare'e”, e'i kupa remē, wayvu pè tè aepo e'itā kupa. Janejare'e rekoa pè rōwā aepo e'itā kupa. Poromoripetà tè aepo e'i kupa. Ajawyi

<sup>a</sup> 1.16 Mat. 17.5; Mak. 9.7; Ruk. 9.35

Janejare'e omomorijautà apijarerà. Āwisō Janerōvijā Jesu omānōma ipe janeaiwererà repykarà rōmō janepijarī remē, nopotai kupa ajamā'ē. Noerovijai kupa. Ajawyi sitō ojimomorijau 'atà tē iko kupa. <sup>2</sup>Pepytery pewarà kō mō mōa'ārōwā “aje ipō” e'i ywe'e titetā ijayvu kō pē ajamā'ē. Poromoripe māe kō ayvu ai rupi oiko ywe'e titetā. Iwaria kō rupi teve ekoitā kupa. A'e kō rē Jesu noerovijai māe kō omā'ē remē, oporegeta ai ywe'e titetā Jesu rē kupa, eewarà kō rewarà mō. “Nikatui Jesu rekoa”, e'i ywe'e titetā āmē kupa. <sup>3</sup>Kee e'i Janejare'e ayvu rē poromo'e rā'āga māe kō ipi. Pepytery pē uu kupa remē, pekarakuri rekyia rē kōrijō oja'atā kupa. A'evoa rōmō opotatā pemoripe kupa. Iwari waritā kupa. Janejare'e okuwapa ekoa kō ajamā'ē. Imomorijau rā omo'ypa amātejē karamoe remeve. Nokeri omājā janere ipi mā'ē tē Janejare'e. Ijaiwererā kō rē omā'ē jē teve iko ipi. Nomoane'e'āi ijaiwererā kō āmē. [Āwitō karamoe remēwarā kō omomorijaua ijaiwererā kō rewarà mō, āwivo ve wereko kōtā āmē.]

<sup>4</sup>Karamoe remē itōkō Janejare'e remīgwai yvapewarā kō mō ojimoāpā ywe'e tite Janejare'e rē. Āmē kee ne'i Janejare'e ee kō omājā: “Nimanyvoi a'evō ekoi kupa remē”, ne'i. Omoisyry kō wena pe wyi ky'y. Ijāpatōnusu e'e tē tena vaiwerā pē omopā'āoka kō. A'e pē oiko puku jē iko kupa, ajaate poromo'e'ya 'arā okwatā. Omomorijau kōtā āmē ky'y. [A'evoa rē tapeja'a jē pejimotokekuwa rōmō, a'e pejē.]<sup>b</sup>

<sup>5</sup>A'evō ve itōkō nivoi māe kō karamoe remē, Janejare'e rekoa rupi noiko tari māe kō. Āmē kee ne'i Janejare'e ee kō omājā: “Nimanyvoi a'evō ekoi kupa remē”, ne'i. Nomoane'e'i ijaiwererā kō. Yy poru kō oinōoka ijapisia kō rōmō. Tāmō Noe kō rōmō'ite wereko katu yy poru wyi āmē ereko. Kee e'i ipi Noe rewarà mō a'evō wereko: “Janejare'e ikō sirovija ipi nē”, e'i imojenu ipi. Ajawyi Janejare'e wau jē ereko katu, ipyriwarā kō revejē, 7 rōmō revejē.<sup>c</sup>

<sup>6</sup>A'evō ve itōkō Sotoma taa wānā kō nivoi ekoi karamoe remē. Komora taa wānā kō teve nivoi ekoi. Āmē kee ne'i Janejare'e ee kō omājā: “Nimanyvoi a'evō ekoi kupa remē”, ne'i. Nomoane'e'i ijaiwererā kō. Tata wasu kō oinōoka, ena kō revejē tokaipa jimo'yjē kupa, nivoi ekoi kupa rewarà mō. Ajawyi aekwerā rē tijaja'a jē jajimotokekuwa rōmō jaiko ipi, tijaiko e'ā eko aiwerā kō rupi jaiko.<sup>d</sup> <sup>7</sup>Tāmō Ero āmē itōkō wekyioka amātejē tata wasu renone. Ivo ekoi mā'ē tē Ero. Ajawyi ojimopirai tesō nivoi māe kō rekoa ai rē omājā ipi.<sup>e</sup> <sup>8</sup>Nivoi māe kō pytery pē ekoi ipi mijā, Sotoma taa pē. Kō'ē jawe jawe omā'ē a'e wānā kō reko aiwerā kō rē ipi. Ijayvu ai kō wenu teve ipi. Ajawyi ojimopirai tesō ijaiwererā kō rewarà mō.

<sup>b</sup> 2.4 Mat. 25.30; J.Jim. 20.1-3,10    <sup>c</sup> 2.5 Jinō. 6.1—7.24    <sup>d</sup> 2.6 Jinō. 19.24-28; Mat. 10.15; 11.24    <sup>e</sup> 2.7 Jinō. 19.1-16,29

<sup>9</sup>Ajawyi jakuwa Janejare'e wereko katu ivo mǎe kō ipi. Waypea wyi wereko katu kō jē ereko kō ipi. Jakuwa nivoi mǎe kō noporijauesai ereko ipi. Imomorijaua rā omo'yipa amǎtejē ee kō. Kāramō poromo'e'yi remē, omono kōtā jimomorijau wasua rena kyty. <sup>10</sup>Jitupi aia rupi ekoi mǎe kō ywesō omomorijautā. A'e kō werōarō ywe'e tite Janejare'e iko kupa. Ajawyi ywesō omomorijau kōtā.

Agyvo Janejare'e ayvu rē poromo'e rǎāga mǎe kō ekoi ipi.<sup>f</sup> Ojimoe'e ywe'e tite kupa ipi. Ojimokasiay ywe'e tite teve iko wee kupa ipi. Yvapewarā kō werōarō ywe'e tite kupa ipi, <sup>11</sup>āwisō yvapewarā kō ywesō ikasiay werōarōarā kō wyi remē. “Janejare'e tapenemavo peneity”, ne'i ajamǎē yvapewarā kō Janerōvijā ywete rovake. [Na'evoi Janejare'e ayvu rē poromo'e rǎāga mǎe kō ajamǎē. A'e kō ojimokasi ywe'e tite ovake.] <sup>12</sup>Āwī rapijarerā wemimota aiwerā rupi kōrijō tē ekoi kupa ipi. Āwitō mijarā ka'aporā wemimotarā rupi tepe'yte oo oo ipi, a'evo ve notekokuwai tesō kupa, jawarā vo 'ejē. Porojai ywe'e tite kupa ipi, notekokuwai kupa rewarā mō. Wemikuwa rōwā oojai kupa ipi. Mijarā ojarō mǎē ojimovija jajuka mǎe rā teāmā mǎē vo 'ejē ojimoma 'atā tē iko kupa. <sup>13</sup>A'e kō poromomorijauvay iko ipi. A'evoa repykarā rōmō Janejare'e omomorijau kōtā amē. Oiko ai tesō teve kupa ipi. Nojimosiokai 'ete wekoa ai rē kupa ipi. Tyvija rupi tē rōwā nivoi ekoi kupa ipi. Jane kō rovake tē tesō a'evo ekoi kupa ipi. Pya rupi tesō a'evo ekoi kupa ipi. 'Arā rupi tesō teve a'evo kupa ipi. Aja paire katu ojimoaty peneve iko kupa. Kee e'i rǎāga peupe amē kupa: “Jesu koty rewarā teve ije”, e'i rǎāga pemoripe kupa ipi. Ojimi'u peneve kupa remē, ojimoane'e jē tesō waiwererā rē iko kupa ipi. Noity'āi waiwererā kō iko kupa. Ory kōrijō tesō ee iko kupa ipi. <sup>14</sup>Noerekoiva'āi tesō wāivī rē jitupia kō kupa. Omǎē tesō jē wāivī kō rē kupa. “Emy'a kuwasi ee mijā!” e'i tē katu ee omājā kupa ipi. Āwisō imy'apa ipe kupa remē, omy'aa rā rē ojipy'amogeta jē tesō kupa ipi. A'evoa rē kōrijō ojipy'amogeta ai iko kupa ipi. Āmō, agyvo ekoi kupa. Jane mō Janejare'e rē nojirovija ywe'ei mǎē mō wesa kupa remē, “Ejo erupi!” e'i kupa ipi. Ovoarā rōmō weraa toiko ai kupa. A'evo poromoripearā rōmō ekoi kupa ipi. Āmō, moma'e moatya rē kōrijō ojitupi ai iko kupa ipi. Āwisō imoma'epa ipe kupa remē, “Emoma'e rāgwe!” e'i jē tesō iko kupa ipi. A'evo 'evo ekoi kupa ipi. Ajawyi Janejare'e remimoaiwea rā rōmō ekoi kupa. <sup>15</sup>Nivoi ekoi kupa rewarā mō, oity ivo tekoua kupa ky'y. Janejare'e rekoa oityppyipa kupa.

Paraā amyry reruparā mō ekoi kupa, Peu ra'yry reruparā mō. [A'e itōkō Janejare'e ayvu omojenu karamoe remē iko mijā.] Ajaire karakuri pyya rē ywesō oja'a ky'y. Ajawyi nivoi 'ete ekoi ipyyarā rōmō ky'y. Nivoi ekoia repy rā rē ywesō oja'a iko rewarā mō a'evo ekoi ywe'e tite. <sup>16</sup>Ajawyi itōkō eima

<sup>f</sup> 2.10.10.8

tẽ tesõ omomyta ojarà ky'y, totekokuwa. Jumẽtu tẽ tesõ omomyta. ãwisõ oje'ẽ mãẽ teãmã ipe jumẽtu. Ajamã'ẽ oporegeta janevo ojarà pè imosõika. Noeraa'ãi ojarà toiko ai otekokuwa e'ãa rupi. A'evo Paraã ekoi karamoe remẽ.<sup>8</sup> [Eruparà rômõ Janejare'e ayvu mojenuarà rã'ãga kõ ekoi age'e remẽ.]

<sup>17</sup>Manyvoa rã rômõ rõwã ãwĩ rapijarerà kõ ekoi. Kee pejẽ ipe ijupewarà kõ rômõ: “Janemotekokuwavaytà”, pejẽ ipe ijupewarà kõ rômõ. Ajamã'ẽ agyvo 'ejẽ kupa. ãwitõ vyv kwarà yy rena typy mãẽ pè, kee ja'e ipe remẽ: “Yy taekyi ipupe wyi”, ja'e ipe remẽ, soõ, naikoi yy! Janeporijau ee. A'evo ekoi kupa.

ãmõ agyvo 'ejẽ kupa. ãwitõ yva rãtasĩ okwa remẽ, kee ja'e tite remẽ: “ãmãna okytã eremitã kõ mory”, ja'e tite remẽ. Ajaire, soõ, nokyi ãmãna. Okwa 'a tẽ yva rãtasĩ. ãwĩvo poromo'e rã'ãga mãe kõ. Nijanemotekokuwa'ãi kupa. Manyvoa rã rômõ rõwã ekoità kupa.

Ajawyi kee e'ipa Janejare'e a'e kõ pewarà mõ: “Pãtõmimi e'ete vo mã'ẽ kyty amono kõtã imokuipe'e kãramõ”, e'ipa. <sup>18</sup>Eko aiwererã kõ rewarã mõ aepo e'ipa. ãmõ, jitupi aia kõ rewarã mõ teve aepo e'ipa. Ojimojõvijã rã'ãga ywe'e tite ojimo'e kupa ipi. “Atekokuwavay”, e'i tite oupe kupa ipi. Notekokuwai kupa ajamã'ẽ. Poromoripe tẽ iko kupa ipi. Ava mõ opota waiwererã reity Janejare'e rekoa rupi toiko remẽ, a'e kõ kee e'itã: “ãni! Orevo jẽsi peiko!” e'itã kupa. A'evo opijarĩ kõtã ivo tekoua wyi kupa ipi. Ajawyi opota waiwererã reity mãe kõ werovija ywe'e tite kupa ipi. Ojimoane'e jẽ ãmẽ iko kupa. Nojimoripei sõ kupa remẽ, oitypypyipatã waiwererã kupa mijã. <sup>19</sup>Kee e'i teve poromo'e rã'ãga mãe kõ: “Nimanyvoĩ ãwĩvo jaiko remẽ. Oropota katu ãwĩvo orerekoa”, e'i ywe'e tite kupa ipi. Ajamã'ẽ nikasi sikaepo waiwererã reitya rẽ kupa ipi. Eko aiwererã nojityokai ijupe kõ. A'evo teãmã waiwererã rẽ ojimoane'e jẽ mãe kõ. <sup>20</sup>Uve jane kõ mõ, agyvo ekoi mãe kõ. Janerõvijã Jesu Kiristu rẽ ojirovijaa rupi oity waiwererã mijã. Aja paire ojivy weko aiwererã kyty kupa. Apijarã kõ pewarã mõ kee a'e. Ojirojivyri waiwererã kyty mã'ẽ ywesõ nikatu'ãi. <sup>21</sup>Ivo katua rupi ekoi apijarerã mijã. Ajaire, soõ, ivo katuy ekoi mã'ẽ oity ywe'e tite kupa. Waiwererã kyty ojirojivy mijẽ ywe'e tite kupa ky'y. Ajawyi ikatu sa'u kuwa, Jesu rupi ivo tekoua nokuwaive remẽ mijã. <sup>22</sup>Agyvo apijarerã kõ. ãwitõ jawa teima owe'ẽ maire, oo mijẽ owe'ẽgwerã wa, a'evo ve waiwererã rẽ ojirojivy mijẽ mãe kõ. ãmõ, agyvo ekoi kupa. ãwitõ tajausĩ jakusu paire ojivy mijẽ tujugã rẽ ojimosĩ. A'evo ivoa rupi oiko paire ojirojivy mijẽ mãe kõ ekoi. Aje ywete a'evo ekoi kupa ipi.

### Janerõvijã ywete vãea rã 'arã rewarã

**3** <sup>1</sup>Eremiau kõ, mõrijõ tesõ akusiwa kareta pejẽ ky'y. Jypy remẽwarã. ãmõ, age'ewarã teve. Akusiwa pejẽ remẽ, poromoja'aoka aje ywete

mã'ê rê pemokasia rômõ, [ãwisõ tapejimoripeoka e'ã Janejare'e ayvu rê poromo'e rã'ãga mãe kô pè,] a'epa pejê. <sup>2</sup>Apota peja'a jê aje Janejare'e ayvu mojenuarà kô ayvukwerà rê, karamoe remêwarà kô ayvukwerà rê. [A'e kô omojenu amãtejê manyvotà kãramõ ke'ĩ Jesu ovãe mijê remê.] A'evoa rã rê tapetekokuwa jê. Apota petekokuwa jê teve Janerõvijã ywete ayvukwerà rê, Janerereko katuara ayvukwerà rê. Emimonokwerà kô remimojenuwerà rê teve tapetekokuwa peiko. [A'evoa rê petekokuwa jê remê napejimoripeoka ywe'e tite'ãi poromoripeara kô pè.]

<sup>3</sup>Kee jaa ywesõ tapekuwa. Ke'itã Jesu ovãe mijê remê, mirã kô wemimota aiwerà rupi ekoi mãe kô uutã pepytery pè. A'e kô pejaitã. Jesu koty rewarà kô rômõ peiko rewarà mō pejaitã kupa. <sup>4</sup>Kee e'i ywe'e titetã kupa: “Mape pō Penõvijã tui? ‘Ajo tarã mijê’, e'i rōwã itõkõ! Emã'ê! Nonurive! Emã'ê! Niteei janereko. Janerãmõi kô opa tesõ ky'y! Ajamã'ê nitee ekøjêi tesõ! Yvy jinõ ypy remêwarerã vo jê age'e remê jaiko”, e'i ywe'e titetã kupa. [Noerovijai Janejare'e ayvu rewarã mō aepo e'i titetã kupa.] <sup>5</sup>Janejare'e tẽ itõkõ wayvu rupi yva oinõ karamoe remê. Yvy ve oinõ wayvu rupi. Yy pupe wyi itõkõ Janejare'e yvy omojisaoka imovija.<sup>h</sup> A'evoa rê “aje” ne'i kupa ajamã'ê, noja'ai a'evoa rê kupa wyi. <sup>6</sup>Ajaire yy pè tẽ itõkõ Janejare'e omomaoka yvy pykwerã. A'e yy poru pè ena kô weroyvypyoka imoma kô.<sup>i</sup> <sup>7</sup>Ãwitõ wayvu rupi tẽ yvy age'ewarã oinõ, yva age'ewarã revejê ereko. A'evõ vetã wayvu rupi teve omoma kõtã kãramõ. Yvy age'ewarã omomatã. Yva teve omomatã. Tata wasu pè tẽ tesõ omomaoka kõtã. Uu poromosã'ãga poromoe'yi remê tẽ a'evotã ekoi. Janejare'e noerovija tari mãe kô omoma remê tẽ a'evõ werekotã.

<sup>8</sup>Kee jaa rê tapeja'a jê peiko, eremiau kô. Janeupe 'arã nipukui ipi. Kuisse'ẽ okwapa ipi. Kwaray ipuku sa'u. 1.000 kwaray tesõ ipuku ywete janeupe. Na'evõ Janejare'e pè. Nipukui ojevo jê ijupe. <sup>9</sup>Ajawyi pejai mãe kô kee e'i titetã pejê: “Manyvore pō Penõvijã nonurive, ‘Nipukui jê ajotã’, e'i rire?” e'i titetã kupa. Aepo jaa pè kee a'e. Nojikõtevêi Janerõvijã ywete ovãea rã rê ajamã'ê. Wãrõ jê jane kô tojimosioka waiwererã kô reityppyipaoka ijupe kupa. Opota pirujê jane kô a'evõ toiko. Opota jane kô pirujê opyri toiko karuaru iko. Nopotai jane kô omonooka owyi. Ajawyi tẽ nonurive.

<sup>10</sup>Nijakuwa amãtejê'ãi Janerõvijã ywete vãea 'arã. Ãwitõ nijakuwa amãtejêi imona mã'ê mō sikaepo uutã vija janema'e kô rê omona rômõ remê, ãwivotã Janerõvijã ywete vãea 'arã. Uu remê tẽ katu jakuwatã. ãmê tẽ yva ryapu poromonyi mã'ê ojenutã jane. ãmê si yva opatã ky'y. Jaytata kô okaipatã opa teve, pirujê. Kwaray ivo teve, opa tary ve. Jay ivo teve. Yvy ve opatã. Ipupewarã kô revejê okãjãtã. Naiko'ãi kupa ky'y. A'evotã Janerõvijã ywete uu mijê remê.<sup>j</sup>

<sup>h</sup> 3.5 Jinõ. 1.6-9    <sup>i</sup> 3.6 Jinõ. 7.11    <sup>j</sup> 3.10 Mat. 24.43-44; Ruk. 12.39-40; 1Tes. 5.2; 2Pe. 3.10; J.Jim. 3.3; 16.15

<sup>11-12</sup> A'evoa rã jakuwapa. Manyvotà pōkō jaikotà ky'y, ajawyi? Ānī! Aje ywete Jesu vāea rã 'arà siārōtā jakupa! “Kuisseẽ jẽ tovāe!” eu. Ivo ikō tijaiko enone nẽ, a'e pejẽ. Janejare'e morya rupi tijaiko ãmẽ. A'e 'arà remẽ sōsi yva okaità opa ky'y. Yvy ivo ve. Yva pupewarà kō ivo ve. <sup>13</sup> Ta'evō ikō ãmẽ kupa nẽ. Ekovijarerà ipyau mǎe rã kō kōrijō tẽ siārō jaiko. A'evoa pẽ Janejare'e kee e'ipa:

– Ekovijarerà kō ainōtā ipyau mǎe kō tẽ ky'y. Yva pyau. Yvy pyau teve. Ikatuaytā kupa ãmẽ. Ivo mǎe kō rena rã tẽ a'e, e'ipa.<sup>k</sup>

<sup>14</sup> A'evoa siārō jẽ jakupa ãmẽ, eremiau kō. Ajawyi kee a'e pejẽ. Tapejimokasi ikō Janejare'e py'a rupi katu tapeiko ipi nẽ. Āwitō nimārāi mǎẽ ekoi mǎẽ vo 'ejẽ tapeiko. A'evō peiko remẽ, napejimosioka'āi iwyi. Pepy'a katu kōrijōtā tẽ ee pemājā penory rōmō.

<sup>15</sup> Kee jaa rẽ tapeja'a jẽ. Janerōvijā ywete opota janeatyry kō opyri janerereko katu rōmō. Ajawyi nojikōtevēi ovāea rã rẽ. Wārō jẽ janemoatya rã upa. A'evoa rẽ janeretārā Pauru okusiwapa teve pejẽ. Aje ywete Janejare'e tẽ omotekokuwa wayvu rẽ tokusiwa. <sup>16</sup> Kareta kō okusiwa remẽ, janemotekokuwaoka ipi, manyvo tijaiko Janerōvijā ywete vāea rã 'arà siārō jẽ jakupa remẽ. Pe'īpe'ī emikusiwarerà kō mō waypete sienu. Jamogeta remẽ: “Manyvo jaa pō aepo jaa?” ja'e. A'e ikusiwarerà Janejare'e ayvu rẽ notekokuwai mǎe kō omogeta remẽ, kee e'i tite kupa: “Eupe niwaypei 'ete aenu!” e'i tite kupa. “Aenu katu emikusiwarerà!” e'i tite kupa. Nokuwai ajamǎ'ẽ kupa. Wemikuwa kōrijō tẽ omojenu kupa. Omotee emikusiwarerà kupa, nokuwai kupa rewarà mō. A'evō wereko ywe'e tite pirujẽ Janejare'e ayvu jikusiwarerà kupa ipi. A'evō teāmā Janejare'e ayvu rẽ poromo'e rǎ'āga mǎe kō ipi. [Ajawyi kāramō Janejare'e poromosǎ'āga remẽ, wemavo kōtā imomorijaupa kō.]

<sup>17</sup> Akuwa pejẽ na'evoi peiko, eremiau kō. Pekuwapa amātejẽ a'evōa. Ajawyi tapejireko katu jẽ ikō nivoi mǎe kō wyi peiko nẽ, a'e pejẽ. Tapeneraa tite e'ā ikō ivo e'āa rupi kupa nẽ. Tapejavy ywe'e tite e'ā Janejare'e rekoa, noerovijai mǎe kō vo. Ivo kō jẽ peiko remẽ, Janejare'e rekoa rupi rōwā peikotā ãmẽ ky'y. <sup>18</sup> Tapejimokasiay ikō Janerōvijā Jesu Kiristu revejẽ tapeiko nẽ, Janerereko katuarā revejẽ. Tapejimotekokuwavay ikō ee peiko nẽ. A'e ywesō ikatuay wete. A'e ywesō ikasiay janere iko mǎ'ẽ. A'e kuwasi jamoe'e karuaru kuwa mijā. Ō'ō, awyje katu āwīvo jamoe'e karuaru jaiko ipi.

[Awyjepa eremikusiwarerà ky'y.]

<sup>k</sup> 3.13 Isa. 65.17; 66.22; J.Jim. 21.1